

Ski-Hase

(Alti Mägd-Clique 1931)



Herje' wie sin die Häsli nett,
Wo rutsche iberm Schnee.
Wie menge mecht do Jäger si
Und treffe uns persée
Denn an der Fasnacht sin mir just,
Erst rächt im Freudeschwung
Und hän ins Tal drum unterno'
Herzhaft, e grosse Sprung.

Verlasse isch dä Führrer jetzt
Fürrot bis ibers Ohr
Die G'nosse hän e Tritt versetzt
Ihm schwer, am Bläsitor
Es winkt Ihm au kai Retigsring
Bim Nationale-Block,
Hesch gmerkt, die Simpelpolitik
Vo Moskau, isch nit Bock.

Vo wegem Hemd, d'Arbeiderschaft
Moralisch schwer entblöst
Zum lache isch's, e Fudiplätz
Am Rhy e Streik uslöst
Ei Hafe, zwei Parteie drin
Bekämpfe sich no barsch
Arbeitermusik blos doch dert
D'r Diktator-e-marsch.

In sternevoller Mitternacht
Isch z'Rieche Schwingfest g'si
Kraftspertler druckt d'r Polizei
Bim Oehse Krepf scheen i,
Was nutze do d'Wachtmeisterschnier
Wenn d'Rasse ein nit kennt
En Arrestant dä Krach benutzt
Und g'mütlig durebrennt.

Die halbi Welt isch leider scho
Vom Gift elend beruscht
Das Ciankali Bühnespiel
Wird pöpelhaft verpfuscht
Die schwarze Gselle hän sich dert
Benoh so g'mein und toll
Si sin scho ins Theater ko
Vom Wi-rauch, sausack voll.

E neue Club mir z'Basel hän
Fir die, wo einsam sin
Im Jungsell und d'r Jumpfere bringt
Die Grindig doch no G'winn
Si klage wo der Schuch si druckt
Und die verschmähti Lieb
Do sehn-er jetzt wie d'Einsamkeit
No wirkt zuem leschte Trieb.

E Berner het im Nazi-Blatt
Blöd gege d'Fasnacht g'hetzt
Me merkt, dass vorem Hus dä Ma
Mischt uffenandersetzt
Mir hän halt no e Ideal
Und räuche nit nur Speck
Däm Säuhirt als e Larve scho —
Si dummi Schnurre deckt.

Me wais worum e jede Hund
So an de Mure schmeckt
Do isch doch d'Nummere g'wiss nit schuld
Wenn Sie, en Er endeckt
Uff glyche Art het d'Lisett au
Der Ainedrisigscht kennt
Ob dä nit Ihre nonem Schmus
Emol isch durebrennt.

Wenn jedi Katz miest in's Asyl
Das gäbt e Riesebau
Vom Radio erklinge tät's
Miau — Miau — Miau,
Fir menge Rolli wär's e Glück
Wenn's Wibli interniert
Vor Aerger ab der falsche Katz
Isch menge scho krepirt.

An jedem Strossenegge gits
Jetzt Hysli, suber g'macht
Me ka telephoniere schynt
Am Tag und au no z'Nacht
Und witt nit in e Hotel go
Und hesch e liebe Schatz
Gosch nur in sone Hysli do
Zwai hän grad dinne Platz.

Kemmet alli am Sunntig Zobe no der Fasnacht
In Musiksaal zuem Schlussobe vo de
Comité-Schnitzelbängg.